

Սիմոնեանն արժանացել է Հայաստանի Հանրապետության գիտության վաստակավոր գործչի տիտղոսի (2014), Սանկտ-Պետերբուրգի Պետական համալսարանի պատուավոր դոկտորի (2012), Ղազախստանի Ղազախստանի անկախության 20ամեակ (2011) եւ Թուրքմենստանի Մահթումկուլի Ֆրագի (2014) պետական պարգևների, Մովսէս Խորենացի (2009) ու Վաչագան Բարեպաշտ (2016) մեդալների:

Արամ Սիմոնեանը կեանքին վաղաժամ հրաժեշտ տուեց 8 Յունիս 2022ին, Երեւանում:

ԱԼԻԿ ՂԱՐԻԲԵԱՆ (algharibyan@yahoo.com)
ՎԱՐՈՒԺԱՆ ՊՕՂՈՍԵԱՆ (varuzhan.poghosyan@bk.ru)

ԳԷՈՐԳ ՏԷՐ ՎԱՐԴԱՆԵԱՆ (1951–2023)

Կեանքի 72րդ տարում իր մահկանացուն կնքեց հայ ձեռագրագիտության երախտավոր, պատմագիտության դոկտոր Գեորգ Տէր Վարդանեանը: Միջնադարեան Հայաստանի գրաւոր-մշակութային ժառանգության անխոնջ ուսումնասիրողը Մաշտոցեան Մատենադարանում իր նախորդներ Լեւոն Խաչիկեանի, Ասատուր Մնացականեանի, Օննիկ Եգանեանի, Արտաշէս Մաթեոսեանի եւ միա արժանաւոր մատենադարանցիների գործի լիիրաւ շարունակողն էր:



Գեորգ Տէր Վարդանեանը ծնուել է 1951 Յունուարի 9ին ՀՀ Տաւուշի մարզի Բերդ համայնքի Ներքին Կարմիրաղբիւր գիւղում: 1973ին աւարտել է ԵՊՀ պատմութեան ֆակուլտէտի հնագիտութեան, աղբիւրագիտութեան եւ ազգագրութեան բաժինը:

1974ից մինչեւ կեանքի վերջը նա աշխատել է Երեւանի Մեսրոպ Մաշտոցի անուան հին ձեռագրերի գիտահետազոտական ինստիտուտ-Մատենադարանում, 1978ից՝ աւագ գիտաշխատող եւ գլխավոր ասանդապահ (մատենապահ), 1992ից՝ նաեւ ձեռագրագիտութեան խմբի/բաժնի ղեկավար/վարիչ: 1984ին պաշտպանել է «Ներսէս Պալիանենցի պատմագրական ժառանգութիւնը (ԺԴ դ.)» թեկնածուականը: 1995-98՝ զբաղեցրել է Հայաստանի Ազգային գրադարանի տնօրէնի պաշտօնը: 2016ին պաշտպանել է դոկտորական՝ «Հայոց պատմագրքերի գիտական բնագրերի կազմութեան խնդիրներ եւ ձեռագրական ասանդոյթներ» թեմայով:

Տէր Վարդանեանին էր վիճակուած շարունակելու Մատենադարանի հայերէն ձեռագրերի մայր ցուցակի բազմահատորեակի հրատարակութիւնը, որը, ցաւօք, չհասցրեց ամբողջական տեսնել: Նրա ստեղծած երիտասարդ ձեռագրագէտների խումբը, որը յետագայում դարձաւ Մատենադարանի առանցքային բաժիններից մէկը՝ սկզբում կոչուելով ձեռագրագիտու-

թեան եւ մայր ցուցակի, իսկ 2019ից՝ պարզապէս ձեռագրագիտութեան, Տէր Վարդանեանի խմբագրութեամբ 2012-19՝ յաջողութեամբ հրատարակեց յիշեալ մատենաշարի թուով հինգ՝ 2-Ժ. հատորները: Իբրեւ կանոն, իւրաքանչիւր հատորի համառօտ առաջաբանում Տէր Վարդանեանը ներկայացնում է տուեալ հատորին առնչուող հանգամանքներ. նշում առաջին եւ երկրորդ նկարագրողների անուններն իրենց նկարագրած ձեռագրերի կարգային համարներին զուգահեռ, նկարագրման-խմբագրման որոշ սկզբունքներ, հատորի բովանդակային առանձնայատկութիւններ, իսկ որ հետաքրքիր է՝ ճորդ հատորի առաջաբանում այն համարում է «դարձակէտային», քանի որ «Ե. հալորով ամարտուեց մեր գիտաշխատողների անցած սերնդի արած նկարագրութիւնների հրապարակումը եւ ներկայովս, բնականաբար, սկսում է յաջորդ սերնդի աշխատանքի արգասիքի ներկայացումը»²: Նոր սերունդը գիտնականի գլխաւորած սաներն էին՝ մեծ մասամբ նախկին ուսանողները, որոնց խմբային աշխատանքի արդիւնքում, կարելի է ասել ամէնօրեայ քննարկումների՝ իրար հետ խորհրդակցելու, դեկավար-խմբագրի հետ համաձայնեցնելու արդիւնքում միայն վերջնական տեսք էին ստանում նկարագրութիւններն ու կեանքի կոչում մատենաշարի արժէքաւոր հատորները: Իր կենդանութեան օրօք հրատարակուած վերջին՝ Ժ. հատորի առաջաբանում Տէր Վարդանեանը հերթական պարզաբանումն է անում առ այն, որ խմբային աշխատանքների դէպքում որեւէ անհատ պէտք է անպայման հոգայ գրքի ընդհանուր խնամքը. «ինչպէս մեր համառօտ ցուցակի Ա-Բ. հալորները (1965, 1970) եւ Մայր ցուցակի Ա. հալորը (1984) տպագրուել են Օննիկ Եգանեանի հիմնական կամ ամբողջական պատասխանատւութեամբ, ճիշտ նոյնպէս՝ մեզ բաժին է ընկել Մայր ցուցակիս վերջին հինգ (2-Ժ.) հալորների խնամքի հոգսը»³: Գիտութեան նուիրեալի «հոգս» ասուածն իր դէպքում սահմանափակում էր միայն բառիս օգտագործմամբ, քանի որ ձեռագրաց մայր ցուցակի պատշաճ կազմումն ու հրատարակումն առանց չափազանցութեան Գէորգ Տէր Վարդանեանի ապրելակերպն էր դարձել:

Թերեւս վերն ասուածով էր պայմանաւորուած իր սիրելի ուսուցչի եւ Մատենադարանի երկարամեայ գլխաւոր ամանդապահ (1958-73)՝ Օննիկ Եգանեանի աշխատութիւններն ամփոփող հատորի կազմում-հրատարակումը (2014)՝ իբրեւ յարգանքի տուրք վաստակաշատ ձեռագրագէտ-ամանդապահի յիշատակին: Եգանեանի առիթով Տէր Վարդանեանը Մատենադարանի գլխաւոր ամանդապահի առաքելութիւնը համարում էր իբրեւ «ձեռագ-

² Գ. Տէր Վարդանեան, «Մուտք», Մայր ցուցակ հայերէն ձեռագրաց Մաշտոցի անուան Մատենադարանի, հ. 2. (Հ^ր 1801-2100), խմբ.՝ Գ. Տէր Վարդանեան, Երեւան, 2012, սիւն. 5:

³ Նոյնի՝ Մաշտոցեան Մատենադարանի Մայր ցուցակի տասներորդ հատորը - Մայր ցուցակ հայերէն ձեռագրաց Մաշտոցի անուան Մատենադարանի, հ. Ժ. (Հ^ր 3001-3400), խմբ.՝ Գ. Տէր Վարդանեան, Երեւան, 2019, սիւն. 8:

րերի ամէնօրեայ խնամքը, շարժը եւ գործածութիւնն ապահովելու շարժապատշաճ անհատական աշխատանք»⁴։ Յիրաւի, նա եւս առաջնորդուեց նոյն գործելաճոճով՝ ձեռագրերի մայր ցուցակը կազմելիս հետեւելով նախ Վիեննայի Մխիթարեան միաբան Յակոբոս վրդ. Տաշեանի, ապա՝ Եգանեանի մշակած եւ ընդունելի դարձած սկզբունքներին, այն է՝ նկարագրութիւններն անել յատուկ հարցակարգով՝ կցելով բազմապիսի ցանկ-ցուցիչներ ու աղիւսակներ՝ պատշաճ ընդարձակ ձեռագրացուցակներին։

Տէր Վարդանեանի գիտական հետազոտութիւնների շրջանակն ընդգրկուն, միաժամանակ որոշակի ուղղուածութիւն ունէր։ Առանցքում հայ աղբիւրագիտութիւնն է՝ նիւթի գիտական նշանակութիւնն ու ուսումնասիրման հրատարակման մեթոդաբանութիւնը. մատենագրութիւն-բնագրագիտութիւն, ձեռագրագիտութիւն, հնագրութիւն, վիմագրութիւն, գրատպութեան պատմութիւն, այսինքն՝ հայ պատմաբանասիրական մտքի ողջ ընտրանին։ Տէր Վարդանեանի հետաքրքրութիւնների ուղեծրում էր։ Բաական է յիշատակել նրա արժէքաւոր յօդաւածներից միքանիսի խորագրերը՝ հասկանալու համար գիտնականի ուսումնասիրութիւնների յենքն ու ասելիքը։ Այս շարքում յատկանշելի են «Փաւստոս Բուզանդի հրատարակութիւններն ու ձեռագրերը» (*Հայկազեան հայագիտական հանդէս*, ԺԹ։1999, էջ 9-63), «Սուրբակի հայկական խաչքարի արձանագրութեան նոր վերծանութիւն» (*Պատմաբանասիրական հանդէս*, 3։1998, էջ 149-54), «Վենետիկի հայոց Ս. Իսաչ եկեղեցու ընծայամատեանը» (*Էջմիածին*, ԺԱ։2013, էջ 60-83), «Ներսէս վարդապետ Ակինեանը եւ իր գիտական վաստակը» (*Հայ-վրացական յարաբերութիւններ*, գ. Ե., խմբ.՝ Հ. Բայրամեան, Երեւան, 2019, էջ 7-25), «Լվովի հայերէն ձեռագրերը եւ Հ. Յովհաննէս վարդապետ Զօհրապեանի ցուցակը» (*Բազմավէպ*, 1-2։2022, էջ 184-210) եւ անլի քան երկու հարիւր գիտական հրապարակումներ, հաղորդումներ ու խմբագրականներ։

Գէորգ Տէր Վարդանեանը մեծ աւանդ ունի նաեւ հայ մատենագիտական աշխատութիւնների կազմման գործում։ Վենետիկի Մխիթարեան միաբանութեան հրաւերով տարիներ շարունակ նա զբաղուել է Ս. Ղազարի (անլի ետք նաեւ Զմմառու վանքի) մատենադարանի ձեռագրերի ուսումնասիրութեամբ ու ցուցակագրմամբ։ Այս ոլորտում նշանակալի է նաեւ Ս. Էջմիածնի բազմաշխատ միաբան, մատենադարանապետ Մեսրոպ մագիստրոս արք. Տէր Մովսիսեանի կենսագործունէութեանը նուիրուած մատենագիտութեան կազմումը (1999), որի շարունակութիւնը եղաւ Մեսրոպ մագիստրոսի՝ Մայր Աթոռի *Արարապ* պարբերականից արտաձուած յօդաւածների ժողովածոյի հրատարակումն իբրեւ «Արարատի Ժառանգութիւնը» վերտառութեամբ շարքի Է. հատոր (2010)։ Համանման էր յիշեալ շարքի Ժ. հատորի՝ երկու գրքով հրատարակուած *Եկեղեցական մատենագրութիւնը*, որտեղ իր

⁴ Գ. Տէր Վարդանեան, «Օննիկ Եգանեանի վաստակը», Օ. Եգանեան, *Աշխատութիւններ*, հրատ. պատ.՝ Գ. Տէր Վարդանեան, Երեւան, 2014, էջ 7։

բարեպաշտ տիկնոջ՝ Սուսաննա Նահապետեանի հետ Տէր Վարդանեանը մէկտեղել, ըստ բովանդակութեան խմբաւորել-դասակարգել է *Արարալը* պարբերականի հրատարակման յիսուներկու տարիների (1868-1919) բնագրական ժառանգութիւնը՝ պատմագրական երկերից մինչեւ վարք-վկայաբանութիւններ ու ձեռագրաց յիշատակարաններ (հտր. Ա-Բ., 2017):

Տէր Վարդանեանը նաեւ հմուտ խմբագիր ու գիտական գործի կազմակերպիչ էր: Մեծ է նրա ներդրումը տարբեր երկրներում հայ ձեռագիր գրքին նուիրուած ցուցահանդէսների կազմակերպման գործում: Դրա առիաւատ-չեան 2007ին Ֆրանսայում Հայաստանի տարուայ աղթիւ անցկացուած ցուցահանդէսն էր, որի համար 2008ին Ֆրանսայի կառավարութեան հրամանագրով Տէր Վարդանեանը պարգեւատրուել է «Գրականութեան եւ արուեստների» շքանշանով: Յետագայ տարիներին եւս շարունակուեցին այդօրինակ ցուցահանդէսներն ինչպէս Միացեալ թագաւորութիւնում (*Օքսֆորդի համալսարանի Բողլէյեան գրադարան, 23 Օգոստոս 2015-28 Փետրուար, 2016*), Ռուսաստանի դաշնութիւնում (*Մոսկուա, Ռուսաստանի պալատութեան պետական թանգարան, 11 Մարտ-13 Յունիս 2016*), այնպէս էլ՝ ԱՄՆում (*Նիւ Եորքի Մետրոպոլիտան թանգարան, 22 Սեպտեմբեր 2018-13 Յունուար 2019*): Տէր Վարդանեանին արժանին մատուցուեց նաեւ 2022ին, երբ թանգարանների միջազգային օրուայ առիթով մշակոյթի ոլորտում ունեցած նշանակալի աւանդի, ինչպէս նաեւ երկարամեայ աշխատանքային գործունէութեան համար պարգեւատրուեց ՀՀ ԿԳՄՍ նախարարութեան ոսկէ մեդալով:

Իւրաքանչիւր գիտնականի գործունէութեան անբաժանելի մասն է նաեւ գիտելիքները գալիք սերունդներին փոխանցելու առաքելութիւնը: Տէր Վարդանեանն այդ գործում եւս արժանատի էր: Ձեռագրագիտութիւն, բնագրագիտութիւն, հայ գրի մշակոյթ, հայ տպագիր գրքի պատմութիւն եւ նման այլ առարկաների շրջանակներում կարդացած նրա դասախօսութիւնները ԵՊՀ պատմութեան ֆակուլտետի տարբեր ամբիոններում, ինչպէս նաեւ՝ Գէորգեան հոգետոր ճեմարանում, դարձել էին ուսանողների սպասուած թոպէները: Երանի թէ դրանք տեւական լինէին եւ շնորհն ունենայինք անվերջ լսելու, սերտելու մեր սիրելի ուսուցչի ու աւագ ընկերոջ խրատական ու բովանդակալից խօսքը:

Յիշատակն արդարոյն օրհնութեամբ եղիցի:

Գէորգ Տէր Վարդանեանը շիջեց 29 Մարտ 2023ին:

ԱՐՍԷՆ ՅԱՐՈՒԹԻԻՆԵԱՆ

ars.vimagrabet@gmail.com